

LIGJ
Nr.7918, datë 13.4.1995

**PËR MIRATIMIN ME NDRYSHIME TË DEKRETIT NR.1030, DATË 23.2.1995 “PËR
EMETIMIN DHE SHPËRNDARJEN E BONOVE TË PRIVATIZIMIT (LEKË
PRIVATIZIMI)” DHE DEKRETIT NR.1049, DATË 27.3.1995 “PËR DISA PLOTËSIME NË
DEKRETIN NR.1030, DATË 23.2.1995 “PËR EMETIMIN DHE SHPËRNDARJEN E
BONOVE TË PRIVATIZIMIT”***

(ndryshuar me dekretin nr. 1630, datë 1.11.1996, ligjin nr.9516, datë 18.4.2006, nr.10 359, datë 16.12.2010, nr. 136/2013, datë 29.4.2013, nr. 40/2015, datë 16.4.2015, nr. 16/2017, datë 16.2.2017, nr. 36/2018, datë 21.6.2018)

(i përditësuar)

Në mbështetje të neneve 16 dhe 28 të ligjit nr.7491, datë 29.4.1991 “Për dispozitat kryesore kushtetuese”

KUVENDI POPULLOR
I REPUBLIKËS SË SHQIPËRISË

V E N D O S I:

Neni 1

Miratohen me ndryshime dekretet nr.1030, datë 23 .2.1995 “Për emetimin dhe shpërndarjen e bonove të privatizimit (lekë privatizimi)” dhe nr.1049, datë 27.3.1995 “Për disa plotësime në dekretin nr.1030, datë 23.2.1995 “Për emetimin dhe shpërndarjen e bonove të privatizimit” me përmbajtjen e plotë të tyre si më poshtë:

Neni 2

Për privatizimin e pasurisë shtetërore nëpërmjet letrave me vlerë Këshilli i Ministrave emeton “Bono privatizimi”.

Neni 3

(ndryshuar fjalia e fundit me ligjin nr.9516, datë 18.4.2006, nr.10 359, datë 16.12.2010, nr.10 495, datë 22.12.2011, nr. 136/2013, datë 29.4.2013, nr. 40/2015, datë 16.4.2015, nr. 16/2017, datë 16.2.2017, nr. 36/2018, datë 21.6.2018)

Bono privatizimi do të përfitojnë të gjithë shtetasit, të cilët në datën 1.1.1995 kanë mbushur moshën 18 vjeç dhe janë regjistruar në zyrat e gjendjes civile, me përjashtim të kategorive të parashikuara në nenin 6 të këtij dekreti.

Afati i përdorimit të bonove dhe lekëve të privatizimit është deri më 31.12.2021.

* Ligji nr.7918, datë 13.4.1995 është botuar në Fletoren Zyrtare nr. 11, datë 31 maj 1995.
Dekreti nr. 1630, datë 1.11.1996 është botuar në Fletoren Zyrtare nr. 27, datë 12 dhjetor 1996.
Ligji nr.9516, datë 18.4.2006 është botuar në Fletoren Zyrtare nr. 46, datë 15 maj 2006.
Ligji nr.10 359, datë 16.12.2010 është botuar në Fletoren Zyrtare nr. 174, datë 27 dhjetor 2010.
Ligji nr.10 495, datë 22.12.2011 është botuar në Fletoren Zyrtare nr. 177, datë 18.1.2012.
Ligji nr. 136/2013, datë 29.4.2013 është botuar në Fletoren Zyrtare nr. 80, datë 15 maj 2013.
Ligji nr. 40/2015, datë 16.4.2015 është botuar në Fletoren Zyrtare nr. 68, datë 4 maj 2015.
Ligj nr. 16/2017, datë 16.2.2017 është botuar në Fletoren Zyrtare nr. 43, datë 9 mars 2017.
Ligji nr. 36/2018, datë 21.6.2018 është botuar në Fletoren Zyrtare nr. 97, datë 2 korrik 2018.

Neni 4

Bonot e privatizimit do të jenë të formës jo emërore. Vlera e tyre do të përcaktohet me vendim të Këshillit të Ministrave, në përputhje me vlerën e pasurisë së ndërmarrjeve shtetërore që do të privatizohen sipas këtyre raporteve:

- shtetasit e moshës nga 18 vjeç deri në 35 vjeç koeficienti 1
- shtetasit e moshës mbi 35 vjeç deri në 55 vjeç koeficienti 1.5
- shtetasit e moshës mbi 55 vjeç e lart koeficienti 2

Neni 5

(ndryshuar fjalia e fundit me dekretin nr.1630, datë 1.11.1996)

Bonot e privatizimit mund të përdoren nga zotëruesi i tyre për qëllimet që vijojnë:

- për të hyrë si aksionarë në shoqëritë tregtare që do të krijohen nga privatizimi i ndërmarrjeve shtetërore,

- për të blerë elemente të veçanta të pasurisë së ndërmarrjeve shtetërore që do të privatizohen,
- për të hyrë si aksionarë në shoqëritë investuese të letrave me vlerë.

Bonot e privatizimit janë të tregtueshme midis personave fizikë dhe juridikë vendas dhe të huaj.

Neni 6

Nuk përfitojnë bono privatizimi kategoritë e shtetasve si më poshtë:

1. Personat që deri në datën e emetimit të bonove të privatizimit kanë përfituar falas pasuri nga procesi i privatizimit të pronës shtetërore sipas ligjit nr.7512, datë 10.8.1991 “Për sanksionimin dhe mbrojtjen e pronës private, të nismës së lirë, të veprimtarive private të pavarura dhe privatizimit” dhe sipas dispozitave të tjera ligjore për privatizimin, me përjashtim të ligjit nr.7652, datë 23.12.1992 “Për privatizimin e banesave shtetërore”.

2. Personat dhe anëtarët e familjeve të tyre, të cilët kanë përfituar tokë në pronësi sipas ligjit nr.7501, datë 19.7.1991 “Për tokën”, pavarësisht se ku e kanë vendbanimin e tyre në kohën e hyrjes në fuqi të këtij dekreti.

3. Personat dhe anëtarët e familjeve të tyre, të cilët deri në datën e emetimit të bonove të privatizimit kanë përfituar tokë në përdorim e pasuri tjetër nga aktet ligjore në fuqi për privatizimin e ndërmarrjeve bujqësore në bazë të vendimit të Këshillit të Ministrave nr.452, datë 17.10.1992 “Për ristrukturimin e ndërmarrjeve bujqësore”.

Pikat 2 dhe 3 të këtij neni nuk do të zbatohen për personat me banim në fshat, të cilët nuk kanë qenë të punësuar në ndërmarrjet bujqësore, por që kanë patur vjetërsi pune në marrëdhënie me shtetin të paktën prej 12 vjet e 6 muaj”.

Neni 7

Këshilli i Ministrave përcakton me vendim procedurat e emetimit dhe të shpërndarjes së bonove, rregullat e përdorimit në procesin e privatizimit, si dhe rregullat e tjera të nevojshme në zbatim të këtij dekreti.

Neni 8

Personat që nëpërmjet falsifikimeve, mashtrimeve ose në çdo formë tjetër të paligjshme përfitojnë pa të drejtë bono privatizimi, dënohen me gjobë në masën 5 herë më shumë se vlera e përfituar.

Me vendosjen dhe arkëtimin e gjobave ngarkohen seksionet e financës në organet e pushtetit lokal.

Neni 9

Personat e ngarkuar për regjistrimin e qytetarëve që përfitojnë bono privatizimi ose që lëshojnë dokumente për këtë qëllim, kur me veprimet e tyre çojnë në përfitime të padrejta të bonove të privatizimit nga qytetarët, dënohen sipas dispozitave përkatëse të Kodit Penal.

Neni 10

Ngarkohet Banka e Shqipërisë të shtypë bonot e privatizimit sipas karakteristikave të përcaktuara nga Ministria e Financave.

Neni 11

Ministria e Financave ngarkohet me përgatitjen e dispozitave ligjore për organizimin dhe veprimtarinë e shoqërive investuese të letrave me vlerë dhe për veprimtarinë e bursës (tregut të letrave me vlerë).

Neni 12

Ngarkohet Banka e Kursimeve për regjistrimin dhe shpërndarjen e bonove të privatizimit.

Neni 13

Në procesin e privatizimit të pronës shtetërore, lekët e privatizimit, të përfituara nga ish të përndjekurit politikë, si dhe obligacionet që do t'u shpërndahen ish-pronarëve, për kompensimin e pasurisë së tyre, do të kenë të njëjtin trajtim si edhe bonot e privatizimit.

Neni 14

Ky ligj hyn në fuqi menjëherë.

Shpallur me dekretin nr.1076, datë 26.4.1995 të Presidentit të Republikës së Shqipërisë, Sali Berisha